

## **Tiänu luosânääli lii hiäju – luosâ piivdon iävtuttuvvojuh uđđâ raijiittâsah, eres kuolij iähtun ložžimeh**

**Suomâ já Taažâ koskâsijn ráđádâlmijn Tiänu puáttee kuálástempaje 2022 kuálástemraijiittâsâin lii ožžum hammiittâs puáttee keesi kuálástemmiärádâssân, main pivdojuh ciälkkámušah. Tiänu luosânaalij tile lii ain hiäju já vuolgâsajeh luosâpiivdon oroh joba hyenebin ko ihe tassaáš.**

Ucánjâs luosâpivdo halijdeh kuittâg tipted, vâi Tiänu luosâpivdokulttuur paijeentoollâm ličij pyerebeht máhđuláš vâdis tiilees. Ministeriöh láá arvâlâm, ete sosiaallij já kulttuurlij suujâi keežild luosâpivdo oleskiäldus ij pyevti juátkid. Luosâpivdo iävtuttuvoo tiptemnâál kuittâg tuše uáli räijejum häämist ärbivyehipivdusijguin. Lováliih pivdopeevih láá kuálástempaje loopâkeččin, kuás saalâsin láá iänááš oovtâ meräive uccâ luosâvejuhâáh. Eres kyelišlaajâi pivdemmáhđulášvuodâid iävtutteh siämmást lasetemnâál.

Tiänu luosânaalij čuávnum vuáđuld toi tile lii arvâlum nuuvt hiäjijun, ete meerâst juuhân kuárņoo luosâmeeri ij teevidi kilelis kuálástem vuolgâsoojijd ubâ ovdil ko oovtâgin luosâ láá kiergânâm kodded. Tave-Atlant tiilijn tábáhtum nubástusâi tiet luosânaalij iälâskem ij lah ovdánem vuordum náálá tááláin kuálástemmiärádâssâiguin. Korrá raijiittâsah tarbâšuvvojuh, ko kuálástem tiptem táálái kuálástemmiärádâssâi mielđ viäruuttičij luosânaalij lijkâs ennuv já hiäjudičij tai iälâskem. Ive 2021 Tiänu luosâpivdo oleskiäldusist láá lamaš suorrâ negatiivliih vaiguttâsah páihâlâšsiärvusân sehe luosân lahtojee ärbitiäđu paijeentolâmân.

Ovdil mainâšum suujâi keežild kuálástempaajeest 2022 luosâpivdo iävtuttuvoo tiptemnâál Tiänust kevttimnâál ärbivyehipivdusijguin, puáđoin neelji peeivi já viermijn kyehti peeivi. Pivdopeevih láá väljejum nuuvt, ete saalâsin uázžoo tuođánalâsávt oovtâ ive meerâst iällâm luosâvejuhâáh já nääli iälâskem tááhust tehálub stuárráb luosâid puáhtá šeštiđ. Luosâ tuorgâpivdo ij iävtuttuu tiptemnâál ollágin.

Luosâpivdo raijim vaiguttâsâid viggeh kepidiđ lassetmáin máhđulášvuodâid eres kyele ko luosâ piivdon. Mađhâseijeid fálloo lope, main uázžu kuálástiđ enâmustáá luoka 6 oovtâ kiedâ puzzâvuoggáin.

Päikkikoddeest ässee kuálásteijeh puávtáččii hárujttiđ riddoost já kárbást tábáhtuvvee tuorgâpivdo, mast ei. vuogâi meeri lii räijejum. Lasseen Tiänust puávtáččij pivded merâkuávžur. Tiänu tehálumos kuoškâsoojijd, Paje- já Vyelikiävņás, puátá puoh tuorgâpiivdon kyeskee rávhuiduttemkuávlu luosâ uálgisaallâs kepidem várás. Luosâi šeštim lii tehálâš tááláá tiileest já eennâm- já meccituáluministeriö haalijd muštottiđ kuálásteijei jieijâs ovdâsvástádâssâst karved luosâi uálgisaallâs.

Ráđádâllâmpuáttus miäldâsiih nubástusah láá celkkimnâál 28.3.2022 räi. Nubástussâid kyeskee pevdikirje lii áigumuš vuáláččäällid njuhčâmáánu loopâst, vâi ääigitâsâsijd kuálástemmiärádâssâid Tiänun uázžuh vuáimán cuáŋuimáánu aalgâst. Meiddei Tiänu uálgijuuvâi kuálástemraijiittâssâid kyeskee asâttâs nubástuttoo siämmáá náálá.

### **Lasetiäđuh**

Vesa Ruusila, pivdotuáluuräädi, p. 0295162051, vesa.ruusila(at)gov.fi

Tapio Hakaste, ráđádâllee virgeolmooš, p. 0295162152, tapio.hakaste(at)gov.fi